


**TEZAUUR LITURGIC**  
**16 AUGUST**

**SLUJBA**  
**SF. CUVIOS**  
**IOACHIM**  
**DE LA**  
**OSOGOVO**



**SERBLIAK, BELGRAD, 1986**



# Мѣсяца Августа въ 16-й день Преподобнаго отца нашего Іоакима Осоговскаго, въ Сарандапорѣ просіявшаго

## НА ВЕЛИЦѢЙ ВЕЧЕРНИ,

**Поёмъ: Блаженъ мужъ.., 1-й антифонъ. На  
Господи возвахъ.., ставимъ стиховъ 10, и  
поёмъ стихиры: Убрусу 3, Богородицы 1 и  
святому отцу 6. Стихиры святому отцу,  
гласъ 8. Самогласны.**

**Преподобне отче Іоакиме,** ты воистину явился еси постникомъ похвала, правовѣрію крѣпость, вселеннѣй свѣтило незаходящее, льстиваго врага не убоявся и страшенія безбожнаго не ужасився, о благодати Божіи, блаженне, еюже премудро попралѣсть безбожную, отъ нея же избави насъ.

**Преподобне отче Іоакиме,** ты воистину взыскалъ еси Бога, и Того свѣтомъ, свѣтлыми сіяніи благочестія желая, царскія двѣры оставивъ, безсмертное наслѣдіе пріять, со Христомъ нынѣ водворяешися, богоблаженне.

**Отче богомудре Іоакиме,** струями слезными умъ свой просвѣтилъ еси и къ Богу бесѣдовалъ еси, пресвѣтлыми чистотами яко столпъ всесвѣтель, благочестія свѣтомъ сіяя, явился еси,

блаженне, монахомъ похвала, и нынѣ всѣхъ насъ сохраняй твоими молитвами.

**Ины стихиры, гласъ 6. Подобень: Все**  
отложше.

**В**се житіе желанное къ Богу предложивъ, міра красоту яко тлѣющую оставилъ еси, и себе Христу предалъ еси, преподобне. Образомъ пощенія очищаяся, и терпѣніемъ противленія, показавъ страстными подвиги смиренія на плоть, богомудренно подѣемъ, пріялъ еси вѣнецъ неувядаемый.

**П**реподобне отче Іоакиме, ты отческаго видѣнія отлучився, плоти отвергся, къ Богу приблизился еси, тамо сущими свѣтятся зарями, благодатными лучами мановеніемъ облистаемъ, и къ Нему прешедъ, богоносе, блаженъ еси нынѣ, со дерзновеніемъ Христу Богу молися о душахъ нашихъ.

**П**реподобне отче Іоакиме, священнымъ Божіимъ путемъ воистину подвизався, правовѣрно Христову Церковь добръ устроилъ еси, богознаменьями вся къ разуму наставляя, ангельски на земли поживъ, и преставлься, пріялъ еси даръ Царствія Его, нынѣ со святыми молися о душахъ нашихъ.

## **Сла́ва, гла́сь 6:**

**Е**же по образу соблю́дь невредимо, умъ влады́ку на страсти па́губныя по́стнически поста́вивъ, во еже по подо́бию, яко мо́щно, возше́ль еси́, му́жески бо естество́ понудивъ, потща́лся еси́ ху́ждшее покорити́ лу́чшему, и плоть порабо́тити ду́ху. Тѣмже мона́шествующимъ яви́лся еси́ ве́рхъ, гражда́нинъ пусты́нный, благо́текущихъ поспѣ́шитель, пра́вило добродѣ́тели. И ны́нѣ на небесѣ́хъ соу́зъ тѣ́ла разрѣ́шився, богому́дре, чи́стѣ зри́ши Святу́ю Трои́цу, моля́ся о насъ вѣ́рою и любове́ю чту́щихъ тя.

## **И ны́нѣ, Богоро́дицы, гла́сь 8:**

**Д**ѣви́честіи ли́цы днесъ та́йно одру́ Дѣ́вы и Ма́тере о́крестъ предста́ять, и ду́ши пра́ведныхъ, обступивше, Цари́цу сла́вятъ. Ови́ убо яко да́ръ дѣ́вство вмѣ́сто мѹра прино́сятъ, ови́ же невеще́ственное пѣ́ніе съ добродѣ́телию прино́сятъ, подоба́етъ бо Ма́тери Бо́жіи яко Цари́цѣ ца́рскими добродѣ́тельми свѣ́тлосія́ющими дорино́ситися. Съ ними́же и мы́, житі́е чи́стое совне́сше, изы́демъ къ погребѣ́нію сущі́я Ма́тере Бо́га на́шего, пѣ́ньми и пѣ́сньми духо́вными согла́сно Ю́ ублажа́юще.

**Входъ. Прокі́мень дне́. Чте́нія три́.**

## **Премудрости Соломона чтение.**

Праведныхъ души въ руцѣ Божіей, и не прикоснется ихъ мука. Непщевани быша во очесѣхъ безумныхъ умерети, и вмѣнися озлобленіе исходъ ихъ, и еже отъ насъ шествіе — сокрушеніе, они же суть въ мирѣ. Ибо предъ лицемъ человѣческимъ, аще и муку приимутъ, упованіе ихъ безсмертія исполнено. И вмалѣ наказани бывше, великими благодѣтельствовани будутъ, яко Богъ искуси я и обрѣте ихъ достойны Себѣ. Яко злато въ горнилѣ, искуси ихъ и, яко всеплодіе жертвенное, пріять я. И во время посѣщенія ихъ, возсіяють, и яко искры по стѣблю, потекутъ. Судятъ языкомъ и обладають людьми, и воцарится Господъ въ нихъ во вѣки. Надѣющіися Нанъ разумѣють истину и вѣрніи въ любви пребудутъ Ему, яко благодать и милость въ преподобныхъ Его и посѣченіе во избранныхъ Его.

## **Премудрости Соломона чтение.**

Праведницы во вѣки живутъ, и въ Господѣ мзда ихъ, и попеченіе ихъ у Вышняго. Сего ради приимутъ царствіе благолѣпія и вѣнецъ доброты отъ руки Господни, зане десницею покрыетъ я и мышцею защититъ ихъ. Прииметъ всеоружіе — рвеніе свое и вооружитъ тварь въ мѣсть врагомъ. Облечетъся въ броня правды и

возложитъ шлемъ — судъ нелицемѣренъ. Прииметь щитъ непобѣдимый — преподобіе, поостритъ же напрасный гнѣвъ — во оружіе, споборетъ же съ нимъ міръ на безумныя. Пойдутъ праволучныя стрѣлы молніины и, яко отъ благокругла лука облаковъ, на намѣреніе полетятъ, и отъ каменомѣтныя ярости исполнь падутъ грады. Вознегодуетъ на нихъ вода морская, рѣки же потопятъ я нагло. Сопротивъ станетъ имъ дѣхъ силы и, яко вихоръ, развѣетъ ихъ, и опустошитъ всю зѣмлю беззаконіе, и злодѣйство превратитъ престолы сильныхъ. Слышите убо, царіе, и разумѣйте, навѣкните, судіи концевъ земли. Внушите держащии множества и гордящися о народѣхъ языковъ, яко дана естъ отъ Господа держава вамъ и сила отъ Вышняго.

### **Премудрости Соломона чтеніе.**

**П**раведникъ, аще постигнетъ скончатися, въ покой будетъ. Старость бо честна не многолѣтна, ниже въ числѣ лѣтъ исчитается. Съдина же естъ мудрость человекомъ, и возрастъ старости — житіе нескверное. Благоугоденъ Богови бывъ, возлюбленъ бысть, и живый посреде грѣшникъ, преставленъ бысть. Восхищенъ бысть, да не злоба измѣнитъ разума его или лѣсть прельститъ душу его. Раченіе бо злобы помрачаетъ добрая и пареніе похоти, премѣняетъ умъ незлобивъ.

Скончався вма́лѣ, испо́лни лѣ́та до́лга, уго́дна бо́  
бо́ Господеви ду́ша е́го, се́го ра́ди потща́ся отъ  
сре́ды лука́вствія. Лю́діе же ви́дѣвше и не  
разу́мѣвше, ни́же поло́жше въ помы́шленіи  
тако́вое, я́ко благода́ть и ми́лость въ  
преподо́бныхъ Е́го и посѣ́щеніе во избра́нныхъ  
Е́го.

### **На литіи стихиры, гласъ 2:**

**К**іими похвала́ми, Христе́ Бо́же, возмо́жемъ  
вѣнча́ти преподо́бнаго отца́ Иоакі́ма? Е́гоже  
избра́въ, десни́цею Сво́ею вѣнча́лъ еси́, явля́я е́го  
свѣ́тило, пусты́ню просвѣ́щающее, рѣ́ки  
исцѣ́ленія недужны́мъ источа́юща и врачбы́  
неоску́дныя пода́юща всѣ́мъ притека́ющимъ къ  
ра́цѣ мо́щей е́го.

**С**вѣ́тила небѣ́сная, купно́ же верте́пи, и  
про́пасти, и звѣ́ріе диві́и удиви́шася о тебѣ́,  
преподо́бне, ви́дѣвше тво́я неизрече́нная чуде́са,  
блаже́нне, и́миже ты́ просла́ви Христо́съ Бо́гъ  
немо́щныя пита́ти. На́мъ же, чту́щимъ святу́ю  
па́мьять твою́, испроси́ ве́лію ми́лость.

**П**реподо́бне о́тче на́шъ, изъ мла́дости  
добродѣ́тели прилѣ́жа, це́рковь бы́лъ еси́  
Пресвята́го Ду́ха, отъ Не́го крѣ́пость прие́мъ  
неду́ги прогоня́ти, челове́ки навча́еши о  
земны́хъ веще́й нерадѣ́ти. Ны́нѣ же, Бо́жія свѣ́та

ра́достно наслажда́ясь, просвѣ́ти на́шу мы́сль, чту́щихъ тя́, блаже́нне Иоакиме.

**Х**ристо́ва рачи́теля, тезоимени́таго безсме́ртію, и́стиннаго учени́ка Христо́ва, красоту́ и похвалу́, единообра́знаго, всѣ́мъ наста́вника, освяще́ннаго отъ младе́нчества Го́сподеви, ли́цы оте́ць, соше́дшеся, восхва́лимъ. Се́й бо желе́ніе божѣ́ственное въ себѣ́ прие́мъ, ми́рскую у́бо оста́ви преле́сть, взе́мъ же я́ко яремъ Крестъ Христо́въ на ра́мо, полки́ бѣсовъ побѣди́ мужески, и на́мъ Божѣ́ственныя любве́ изрядный пу́ть пока́зъ дѣ́тельно, и́бо и са́мъ тща́ніемъ дости́же Свѣ́тъ и́стинный, Тро́ицы Вседѣ́тельныя. О, чудесе́ ужа́снаго и ве́щи богоподобны́я! Я́ко зе́мень сый естество́мъ, ра́вень бы́сть мы́сленнымъ существо́мъ, сла́ву и че́сть божѣ́ственную восприе́мъ, и моли́твенникъ на́мъ быва́етъ, я́ко да уллучи́мъ вѣ́чныхъ бла́гъ во де́нь Су́дный.

### **Сла́ва, гла́сь 6:**

**О**те́ческую доброту́, по́стникомъ украше́ніе, исто́чника чудесъ и къ Бо́гу моли́твенника непосты́дна, стѣкшеся, о пражднолю́бцы, пѣ́снями и похвала́ми воспой́мъ, глаго́люще: ра́дуйся, ино́ческаго житі́я пра́вило, о́бразъ и печа́ть извѣ́стная; ра́дуйся, свѣ́тильниче пресвѣ́тлый, озаря́й вся́ свѣ́тлостью́ добродѣ́телей; ра́дуйся, и́же въ бѣ́дахъ вели́кій

утѣшителю и теплѣй предстателю. Ты ѹбо, ѳтче  
Іоакиме, не престаѣй молитися Христу Богу о  
стадѣ своемъ семъ, и о всѣхъ вѣрно  
почитающихъ всечестное успѣніе твое.

### **И нынѣ, праздника, гласъ 8. Леонѳа деспѳта:**

**У**вѣрѣя Іисусъ, Сынъ Твой, Богородице, и Богъ  
нашъ, два естества Своя, ѣко ѹбо человекъ  
умираетъ и ѣкоже Богъ востаетъ. И Тя,  
Богомати, закономъ естества умрѣти  
благоизволи, да не невѣрнымъ привидѣніе  
мнитъ смотрѣніе. Прешла бо еси къ небеснѣй  
странѣ, небесная Невѣсто, ѣко отъ чертога  
селенія Твоего отъ земли взята. Освятисѣ  
воздухъ восхожденіемъ Твоимъ, ѣко просвѣтисѣ  
земля рождествомъ Твоимъ, предпосылаютъ  
апѳстоли, и ангели подѣмлютъ. Тѣмже,  
погрѣбше пречистое тѣло Твое и надгробное  
пѣніе воспѣвше, ужасно зряху и со страхомъ  
глаголаху: сія измѣна десницы Вышняго, Той бо  
посреди Тебѣ, и не подвижешисѣ. Но, о  
Многопѣтая Мати, не отступай, насъ  
назираючи: мы бо людіе Твои и овцы пажити  
Твоя, и имя Твое призываемъ, просяще Тебѣ  
ради спасенія и велія милости.

### **На стиховнѣ стихиры самогласны, гласъ 2:**

**М**ощей твоихъ рака, всехвальнѣй ѳтче,  
источаетъ исцѣленія, и святая твоя душа, со

а́нгелы совоку́пльши́ся, досто́йно ра́дуется, имѣ́я  
у́бо дерзнове́ніе къ Бо́гу, То́го моли́ спасті́ся  
душа́мъ на́шимъ.

**Стихъ:** Че́стна́ предъ Го́сподемъ сме́рть  
преподо́бныхъ Его́.

**И**сто́чникъ чуде́сь и рѣ́ку дарова́ній  
человѣ́комъ, ра́ку твои́хъ моще́й показа́ Госпо́дь,  
о́тче Иоакі́ме, премудре́, слѣ́пымъ е́же ви́дѣти сія́  
дарова́ся, прокаже́ннымъ же очище́ніе,  
одержі́мыя же нечи́стыми ду́хи отъ власте́й ихъ  
избавля́етъ и цѣ́ломудры творі́тъ.

**Стихъ:** Блаже́нъ му́жъ, боя́йся Го́спода, въ  
заповѣ́дехъ Его́ восхо́щетъ зѣ́ло.

**Ра́**дуйся, по́стникомъ свѣ́тило,  
иночеству́ющимъ звѣ́здо, па́стыремъ похва́ло,  
о́тче Иоакі́ме, преподо́бныхъ собесѣ́днице;  
ра́дуйся, Тро́ицы жили́ще; ра́дуйся, любви́  
милова́нія исто́чнице; ра́дуйся, пресвѣ́тлый  
свѣ́тильниче рассу́ждѣнія; ра́дуйся, добродѣ́тели  
пра́вило пра́вое и сто́лпе одушевле́нный.

### **Сла́ва, гла́сь 8:**

**М**она́ховъ мно́жества, наста́вника тя́  
почита́емъ, о́тче на́шъ Иоакі́ме, твоёю бо стезе́ю  
вои́стинну пра́во ході́ти позна́хомъ. Блаже́нъ  
еси́, Христу́ рабо́тавъ и вра́жію обличи́ль еси́  
си́лу, а́нгеловъ собесѣ́днице, преподо́бныхъ  
соприча́стниче и пра́ведныхъ, съ ни́ми же

моли́ся Го́сподеви, поми́ловатися ду́шамъ  
нашимъ.

**И нынѣ, праздни́ка, гла́съ 2. Анато́ліево:**

**Я**же небѣсъ вы́шшая су́щи, и херувимъ  
сла́внѣйшая, и всея́ тва́ри честнѣйшая, яже  
премно́гія ра́ди чистоты́, Присносу́щнаго  
Су́щества пріятелище бѣвши, въ Сыно́внѣ ру́цѣ  
днѣсь всесвятую́ предае́тъ ду́шу, и съ Нею  
исполня́ются вся́ческая ра́дости, и намъ да́руеть  
вѣлію ми́лость.

**На благослове́ніи хлѣбовъ: Тропа́рь  
преподобнаго, гла́съ 1-й, два́жды. И  
 праздни́ка, гла́съ 1-й: Въ рождествѣ́  
дѣвство.., еди́ножды.**

**Тропа́рь преподобнаго, гла́съ 1:**

**П**усты́нный жи́тель, и въ тѣлеси́ а́нгель, и  
чудотво́рецъ яви́лся еси́, богоно́се о́тче нашъ  
Іоакіме: постомъ, бдѣ́ніемъ, моли́твою небѣсная  
дарова́нія пріе́мъ, исцѣ́ляеши недужныя и ду́ши  
вѣрою притека́ющимъ ти. Сла́ва Да́вшему тебѣ́  
крѣ́пость, сла́ва Вѣнча́вшему тя, сла́ва  
Дѣ́йствующему тобою́ всѣ́мъ исцѣ́ленія.

## НА УТРЕНИ,

**На Бѡгъ Господь: Тропарь Убрусу, гласъ 2, дважды. Слава, тропарь [преподобному]:**

**Пустынный житель... И нынѣ, тропарь празднику: Въ рождествѣ дѣвство...**

**По 1-й стихологіи съдалень, гласъ 1.**

**Подобень: Грѡбъ Твоѣй.**

Грѡбъ твоѣй, ѡтче Іоакиме, истѡчникъ явѣся, источая благодать исцѣленія всегда, вѣрно притекающимъ къ мощемъ твоимъ, блаженне. Тѣмже и мы вопіемъ ти: сподоби насъ, молитвами твоими, исцѣленіе пріяти отъ страстей нашихъ. **Слава, тойже.**

**И нынѣ, праздника, гласъ тойже. [Подобень: Камени запечатану.]**

Ликъ божественныхъ апѡстоль собрася погребсти Тя пречестно, Богородице Всечистая, съ нимиже и ангельстии чини воспѣваху преставленіе Твое, взывающе прехвально. Съ нимиже и мы, любовію играюще, Чистая, хвалу Тебѣ приносимъ, гласы пѣсенными, вѣрнии, и вопіемъ: радуйся, Предстательнице присночтущихъ Тя.

**По 2-й стихологіи съдалень, гласъ 4.**

Многосвѣтлая звѣзда монашествующимъ показался еси и степень извѣстна, воздержанія же предѣль, пресвѣтлое зеркало разсужденія,

преподобне, иже память твою совершающе, просимъ разрѣшеніе грѣховъ, треблаженне отче, Господеви предстоя. **Слава, тойже.**

**И нынѣ, праздника, гласъ тойже. Подобенъ:**  
**Удивися Іосифъ.**

**З**ряще войстинну ангельская воинства преставленіе Твое, Пресвятая Владычице Чистая, Благословенная Всепѣтая Богородице, имуще волею рожденна изъ Тебе, ликъ ученикъ собравшеса, съ веселіемъ ношаху честное въ рай тѣло Твое, Христа поюще, Живодавца суща во вѣки.

**По поіелѣи съдаленъ, гласъ 8. Подобенъ:**  
**Премудрости.**

**В**идѣніе и дѣяніе воспріемъ, чувствія преподобно украшая, житіе направилъ еси къ Божественнымъ повелѣніемъ, монахомъ бо явился еси свѣтильникъ свѣтель, наставляя и просвѣщая насъ къ познанію. Тѣмже, восхваляюще, величаемъ любовію исходную память твою, преподобне отче нашъ Іоакиме; сего ради вопіемъ ти: моли Христа Бога грѣховъ оставленіе подати, чтущимъ любовію святую память твою. **Слава, тойже.**

**И нынѣ, гласъ 3. Подобенъ: Красотѣ дѣвства**  
**Твоего.**

**Въ** рождествѣ Твоемъ зачатіе безсѣменное, во успеніи Твоемъ мѣртвость нетлѣнная, чудо въ чудеси сугубо стечѣся Богородице: како бо Неискусомужная, Младопитательница чиста сущи? Како же Мати Богу мертвоносна муроухающи? Тѣмже со Ангеломъ вопіемъ Ти: радуйся, Благодатная.

**Таже степенна, 1-й антифонъ 4-го гласа. Прокимень, гласъ 4: Честна предъ Господемъ\* смѣртъ преподобныхъ Его. Стихъ: Что воздамъ Господеви о всѣхъ, яже воздаде ми? Всякое дыханіе... Евангеліе Луки, зачало 48, отъ полу.**

**По 50-мъ псалмѣ стихира, гласъ 6:**

Гора, небеси подобляшеса, пріемлющи свѣтильника пустыннаго, отца Іоакима, яко мати младенца, стараніемъ отеческимъ. Ты же, преподобне отче, яко орелъ Святымъ Духомъ прелетая горы и вертепы Осоговскія выспренно, краснодушіемъ просвѣщаеши вѣрныя, притекающія къ честному твоему гробу, тѣмже веселіемъ воспоймъ: съ Богородицею моли спастися душамъ нашимъ.

**Канонъ Богородицы на 2, Нерукотвореннаго образа на 4, преподобнаго отца на 6. Канонъ преподобнаго отца, гласъ 8.**

## ПѢСНЬ 1.

**Ирмосъ:** Колесницегонителя фараона погрузи чудотвори́и иногда Моисе́йскіи жезлъ, крестообразно порази́вь и раздѣли́вь море, Израи́ля же бѣглеца́, пѣшеходца спасе́, пѣснь Богови воспѣва́юща.

**Свѣтило** да́нное пусты́ннымъ, красноблаже́нне о́тче Иоакіме, омраче́нное моё се́рдце съ душе́ю просвѣти́, молю́тися, твои́ми моли́твами мра́къ отгна́вь и прича́стіе свѣ́та испроси́.

**Во** чи́стѣй и непоро́чнѣй жи́зни добродѣ́тельми, свя́те, по́стникомъ свѣ́тило бы́сть, богогла́се, я́коже дрѣ́вле Самуи́ль прозира́я бу́дущая, по обѣ́тованію бы́вь сосу́дь пречестна́й Ду́ху Пресвято́му.

**Я**снымъ житі́емъ, преблаже́нне, сія́я я́ко а́нгель, о́тъ ю́ности у́бо бы́ль еси́ сосу́дь пречестна́й, вы́ше житія́ возше́дь чело́вѣча, богому́дре, добродѣ́тельми ду́шу при́сно вѣнча́вая, о́тче Иоакіме.

**О**тъ ю́ности сса́вь добродѣ́тель воздержанія, болѣ́зными и по́ты по́стническими мужество́ достигль еси́ и въ мѣ́ру духо́внаго приспѣ́ль еси́ во́зраста Христо́ва, о́тче преподо́бне.

**С**тра́сти плотскія покоривъ и пучи́ну грѣ́ховъ преше́дь, къ ти́хому приста́нищу безстра́стія немóкренно устремилсѧ еси́, о́тче преподо́бне.

**Богородичень:** Слово, еже безъ матери изъ Отца, Сего напоследокъ богомужно родила еси Единого, Богомати, яко вышши всѣхъ тварей.

**Катавасія:** Преукрашенная...

### **Пѣснь 3.**

**Ирмосъ:** Утвержеи въ началъ небеса разумомъ и землю на водахъ основавый, на камени мя, Христе, заповѣдей Твоихъ утверди, яко нѣсть святъ, паче Тебе, единое Человѣколюбче.

Пощеніемъ процвѣте цвѣтъ богоразумный, неплодная ложесна разверзая, якоже древле Самуиль и Предтеча, святыи Креститель, съ нимиже, богогласе отче, нынѣ за насъ молися.

Утвержденіе всѣмъ яви тя Владыка, цѣломудріемъ украсивъ пустыннымъ, сладости же источникъ и удержаніе похотей образъ ты показа.

Сладости духовныя исполни пустыню Осоговскую, яко источникъ кипящій благодатию сіяя, демонскія лѣсти вся искоренивъ, тѣмже восприялъ еси вѣнецъ побѣды, отче Іоакиме.

Возшедъ на высоту безстрастія и добродѣтелей, во мракъ боговидѣнія вшелъ еси, преподобне отче Іоакиме, и приялъ еси въ сердце своемъ законъ Божественный, имже укрѣпленъ,

монашествующимъ свѣтильникъ пресвѣтель  
быль еси, отче преподобне.

**П**лодовита маслина въ дому Господни явѣ  
насажденъ явился еси, отче, масломъ подвиговъ  
твоихъ умасти лица наша, восхваляющихъ твоя  
чудеса, Иоакиме преподобне.

**Богородичень:** Лѣнностію житіе мое иждихъ и  
грѣхми сердце осквернихъ, приступаю къ Тебѣ,  
Владычице, умиленіемъ души, и молюся: ущедри  
и спаси мя.

### **Кондакъ Успенія, гласъ 2:**

**В**ъ молитвахъ неусыпающую Богородицу и въ  
предстательствахъ непреложное упованіе, гробъ  
и умерщвление не удержаста: якоже бо Живота  
Матерь, къ животу престави, во утробу  
Вселивыйся приснодѣвственную.

### **[Икосъ:**

**О**гради моя помышления, Христе мой, ибо  
Стѣну міра воспѣти дерзаю, Чистую Матерь  
Твою, на столпѣ глаголь укрѣпи мя, и въ  
тяжкихъ мысляхъ заступи мя, Ты бо  
взывающимъ и просящимъ вѣрою моленія  
исполняеши. Ты мнѣ убо даруй языкъ приносень  
и помысль непостыденъ: всякое бо даяніе сіянія  
отъ Тебѣ низпосылается, Свѣтоподателю, во  
утробу вселивыйся приснодѣвственную].

## **Съдаленъ преподобнаго отца, гласъ 8.**

### **Подобенъ: Премудрости.**

**С**траданія болѣзными искушаемъ, страданіями же утверждаемъ пощенія, злата свѣтлѣйшій благочестіемъ облисталь еси, и чистое пріятелище былъ еси Духа, лукавыхъ бѣсовъ тму разгнавъ. Тѣмъ собранному множеству благочестивыхъ былъ еси пастырь и свѣтильникъ свѣтель, Іоакиме блаженне, моли Христа Бога, грѣховъ оставленіе даровати чтущимъ любовію святую память твою.

### **Слава, Образа, гласъ 4. Подобенъ:**

#### **Вознесыйся.**

**С**шѣдый съ небесе за милосердіе милости, Благоутробне Спасе, плоти Твоея пресвятыя днесь пречистый зракъ граду чтущему Тя, и людемъ христоименитымъ сокровище подалъ еси, яко твердо всеоружіе, отъ негоже почерпающе освященіе, сего вѣрою теплѣ пріимемъ.

### **И нынѣ, праздника. Подобенъ тойже:**

**В**ъ руцѣ Сына Твоего и Бога нынѣ предавши душу святую, ни тѣло же оставила еси во гробѣ: якоже бо пріять Жизнь всѣхъ, сице по смерти къ Животу преставльшися, Богородицу Тя истинную вѣдущимъ источаеши животь вѣчный.

## ПѢСНЬ 4.

**Ирмосъ:** Ты́ моя́ крѣ́пость, Го́споди, Ты́ моя́ и́ сила, Ты́ мой Бо́гъ, Ты́ мое́ ра́дованіе, не оста́вь нѣ́дра Отча, и на́шу нищету́ посьти́вь. Тѣ́мъ съ проро́комъ Авваку́момъ зову́ Ти: си́ль Твое́й сла́ва, Человѣ́колюбче.

**Ты́** мі́ръ оста́вивъ, о́тче Іоакі́ме, вѣ́сь Бо́гу себѣ́ предаде́, чистото́ю же обложивъ́ себѣ́, возше́ль еси́ на о́ное свято́е житі́е, идѣ́же весе́ляся со а́нгелы, моли́ Христа́ Бо́га, спасті́ся душа́мъ на́шимъ.

**Ты́** Исто́чника благосты́ни возлюбилъ́ еси́, преподо́бне, жа́ждущія́ сія́ возвеселилъ́ еси́, бѣ́совскія́ полки́ разгоня́я, верте́пы и го́ры Осого́вскія́ богоразу́міемъ исполни́въ, тѣ́мже, соше́дшеся, па́мять твою́ прославля́емъ, о́тче блаже́нне.

**Новора́сль** плодоно́сная изъ́ непло́дна ко́рене прозябе́, постомъ́ и моли́твою возсія́въ, рѣ́ки исцѣ́ленія́ точи́ль еси́, я́коже Моисе́й дрѣ́влъ лю́демъ въ́ пусты́ни, о́тче Іоакі́ме.

**Наса́ждень** бы́въ при вода́хъ, воздержанія́ лоза́ богорасленна́ яви́лся еси́, блаже́нне, грозді́е благоче́стія́ предлага́я.

**На** ка́мени вѣ́ры сто́пы се́рдца твоего́ поста́вивъ, непоколебимъ́ бы́ль еси́, преблаже́нне, прило́ги бѣ́совскими́ не ужаса́йся.

**Богородичень:** Херувимъ превышшую и серафимъ, Тя поемъ, Пречистая, на руку плотию носила еси Бога нашего, Егоже бо трепещуть вся силы небесныя.

### **Пѣснь 5.**

**Ирмосъ:** *Вскую мя отринуль еси отъ лица Твоего, Свѣте незаходимый, и покрыла мя естъ чуждая тма окаяннаго? Но обрати мя, и къ свѣту заповѣдей Твоихъ пути моя направи, молюся.*

**Постникомъ** на небеса путь благовѣрно отвѣрзль еси, отче Иоакиме, восходя умомъ присно къ небеснымъ, на высоту вся вознося, яко столпъ огненный благодатию облаки облистая.

**Врача,** болящимъ страсти отгоняща, показа тя Христось, отче Иоакиме, и питателя алчущимъ, безумнымъ казателя цѣломудренна, сирымъ же и нищимъ заступника.

**Лучами** Божественными вся просвѣтилъ еси, отче Иоакиме, вражия ополченія, богогласе, разорилъ еси, благостынею всѣхъ упася, якоже Христось, славне, возводиши къ небеснымъ.

**На** гору истиннодѣтельную воздержаніемъ востѣклъ еси, богоносе, и съ высоты правду твою показавъ, вселенныя концы паче солнца облистаяюща чудесы.

**Не** оскудѣлъ еси́ мно́гимъ по́двигомъ, добродѣтели приближаяся, но́щи бо и дни, преподо́бне, пребы́лъ еси́ стоя, непрекло́ненъ нуждами естества́.

**Богородиченьъ:** **Сло́во** Отчее, предочи́стившися, о Чистая, Ду́хомъ, словеснаго естества́ на благодѣя́ніе родила́ еси́.

### **Пѣснь 6.**

**Ирмосъ:** *Очи́сти мя́, Спа́се, мно́га бо беззаконія́ моя́, и изъ глубины́ золь возведи́, молю́ся, къ Тебѣ́ бо возопи́хъ, и услы́ши мя́, Бо́же спасе́нія моего́.*

**Вла́сть** прие́мъ отъ Бо́га на бѣсы противныя, о́тче Иоакиме, постомъ поборника богоизбранна́тя показа́, твоими́ моли́твами недуги исцѣляя́ и стра́сти отгоня́, богогла́се о́тче нашъ.

**Блаже́нъ** вои́стинну бы́лъ еси́, о́тче Иоакиме, вся́ плотская́ уго́дія возненавидѣвъ, врага́ низложилъ еси́, тѣмже прия́лъ еси́ вѣнецъ небесный.

**Житіе́** твоё воздержаніемъ и рыданіемъ препроводилъ еси́, преподо́бне о́тче, желаніе бо Божественное ты́ распаляя́, нынѣ́ на небесѣхъ обрѣ́лъ еси́ утѣше́ніе, съ ли́ки преподо́бныхъ совокупа́яся.

**Великому** въ добродѣтельхъ поревновалъ еси Анто́нію, и сему́ дѹхомъ послѣдуя, воздержаніемъ, преподобне, верховенъ явился еси, и стаду твоему во утверждѣніе.

**Нестяжательное** житіе поживъ, преблаженне, птицамъ подобно крылы безстрастія облегчаемъ, радуяся, вышнія достигль еси обители, сего ради вѣрою ты ублажаемъ.

**Богородичень:** Богородице Дѣво нескверная, Сына Твоего моли съ горними силами, прощѣніе прегрѣшеній прежде конца дароватися, вѣрно Ты славящимъ.

**Кондакъ, гласъ 2. [Подобень: Въ молитвахъ.]**

**Въ** молитвахъ неусыпаемыхъ, силу на противнаго врага восприялъ еси, терпѣніемъ бо своимъ, отче Іоакиме, на небеса возшелъ еси, жизнь бо тлѣнную оставивъ, въ нетлѣніе преселился еси, тѣмже ты прославляемъ.

**Икосъ:**

**Гора** Осоговская тебе исповѣда, отче Іоакиме, пастыря душамъ нашимъ, недуги исцѣляюща, помощника суща и заступника міру, тѣмже и хваляще ты, вопіемъ: радуйся, свѣтлая монашествующихъ славо; радуйся, ясный цѣломудрія столпе; радуйся, мужеству явѣ сказательное познаніе; радуйся, премудраго разума явленіе; радуйся, правило

равностоятельное правдѣ извѣстно; радуйся, уме наслаждаяся неизреченныхъ мыслей; радуйся, имже посрамишася бѣси; радуйся, помощниче всѣмъ иже вѣрно ти вопіющимъ: радуйся, отче Іоакиме.

## **Пѣснь 7.**

**Ирмосъ:** *Божія снисхожденія огонь устыдѣся въ Вавилонѣ иногда, сего ради отроцы въ пещи, радованною ногою, яко во цвѣтницѣ, ликующе пояху: благословенъ еси, Боже отецъ нашихъ.*

**Постниковъ** красоту святѣни проявивъ, отче, воздержаніемъ своимъ показавъ еси житіе изрядно, и нынѣ непрестанно со ангелы воспѣваеши: благословенъ Богъ отецъ нашихъ.

**Оружіе** обоюду остро ты показавъ Христосъ, блаженне, на враги противныя, попирая ополченія безбожная и веселя души поющихъ: благословенъ Богъ отецъ нашихъ.

**Во свѣтѣ** неизреченнѣмъ со безплотными лики предстоя, богогласе отче Іоакиме, не презри мене погибающа, но твою пречестную молитву за насъ сотвори Вышнему Богу помиловати ны.

**Чудесъ** зари простеръ, озаряеши колеблющія мглою страсти, и лучи крѣпости подаваеши въ день нарочитъ зывающимъ: отецъ нашихъ Боже, благословенъ еси.

**Богородичень:** Пло́дь чре́ва Твоего́, Пречи́стая, проро́ковъ е́сть и зако́на исполне́ние, тѣмъ Тя́, Богороди́цу, въ вѣдѣ́нни сла́вяще, благоче́стно велича́емъ.

### **Пѣснь 8.**

**Ирмо́сь:** *Седмери́цею пе́щь халде́йскій мучи́тель богочести́вымъ неистовно разжже́, си́лою же лу́чшею спасе́ны сія́ ви́дѣвъ, Твори́у и Изба́вителю вопія́ше: о́троцы, благослови́те, священни́цы, воспойте, лю́діе, превозноси́те во вся́ вѣ́ки.*

**Б**огоприя́тенъ пло́дь изъ непло́дныхъ ложе́снъ пусты́ни Осого́вскія прозябе́ на многопло́дство; верте́пы, го́ры и про́пасти Осого́вскія исполня́еши Бо́жія уче́нія и свѣ́тлости вы́шнія, ё́юже озари́ на́съ, о́тче Іоакі́ме, да вопіе́мъ: священни́цы, воспойте, лю́діе, превозноси́те во вся́ вѣ́ки.

**Ж**итіе́ безплотное́ имѣ́я, во плоти́ же съи́й, я́ко а́нгель плоти́ уго́дія не позна́лъ еси́, свя́те; вы́ше челове́къ поживѣ́, полки́ бѣсовскія́ и ле́сть ихъ искорени́лъ еси́, пусты́ню украси́, со а́нгелы вопія́: священни́цы, воспойте, лю́діе, превозноси́те во вся́ вѣ́ки.

**В**озвесели́ся пусты́ня Осого́вская, жа́ждущи при́сно прозябе́нія добродѣ́тели, днёсь поще́нія свѣ́тлый цвѣ́тъ въ тебѣ́ прозябе́, я́коже дре́вле

Самуи́ль и Предте́ча, изъ непло́дна чре́ва, тобо́ю процвѣ́тоша верте́пы и про́пасти, и свѣ́тло украше́ни бы́ша.

**К**рѣ́постию ума́ вся сѣ́ти вра́жія попра́ль еси́ и, я́ко пти́ца, благі́я юдо́ли, крилѣ́ имѣ́я позлаще́ны, возше́ль еси́ къ вы́сотѣ́ небеснѣ́й, блаже́нне Іоакі́ме, свѣ́тильниче мона́шествующимъ, вопі́я: священни́цы, воспойте́, лю́діе, превозно́сите во вся́ вѣ́ки.

**В**ъ моли́твахъ бо́дрое, въ поще́ніихъ благомо́щное, въ напа́стехъ терпѣ́ливное на земли́, я́ко а́нгель житі́е показу́я, Іоакі́ме блаже́нне, вопі́яль еси́: священни́цы, воспойте́, лю́діе, превозно́сите во вся́ вѣ́ки.

**Богородичень:** Пло́дь чре́ва Твоего́, Богоневѣ́сто, показáся чело́вкомъ спасе́нія ходата́йственный, тѣ́мъ Тя́, Богороди́цу, разумомъ́ и язы́комъ сла́вяще, вѣ́рніи, велича́емъ.

## **Пѣснь 9.**

**Ирмо́сь:** Ужасе́ся о се́мъ не́бо, и земли́ удиви́шася концы́, я́ко Бо́гъ яви́ся чело́вкомъ плоти́ски, и чре́во Твое́ бы́сть пространнѣ́йшее не́бесъ. Тѣ́мъ Тя́, Богороди́цу, а́нгеловъ́ и чело́вкъ́ чинонача́лія велича́ютъ.

**К**рило́ма на вы́соту́ прі́сно вы́спрь возлета́я, пусты́ни и го́ры Осого́вскія́ прелетѣ́ль еси́,

вертепы же и пропасти исполни свѣтомъ богоразумія, отче Іоакиме. Тѣмже и мы, творяще память твою пресвѣтлую, молимся, испроси намъ оставленіе грѣховъ.

**Г**ора златозарна былъ еси, отче преблаженне, горы и вертепы Осоговскія исполни ангельскаго пѣнія, имже возвеселися пустыня Осоговская и яко кринъ процвѣте. Тѣмже, преподобне, со ангелы предстоя во славу, молися непрестанно о насъ.

**И**зрядными лучами яко солнце просіявъ, треблаженне, житіемъ твоимъ святымъ пустыни Осоговскія яко грады сотворилъ еси. Тѣмже нынѣ, въ лицѣ ангельствъ предстояй, со пророки, купно и патриарси, и апостолы, блаженне, молися о насъ.

**Я**вился твоя вѣлія слава, яже по Бозѣ, просвѣщающая всю тварь священными уподобленіи непорочнаго житія, богомудре Іоакиме, воистину былъ еси монахомъ украшеніе и отцемъ верховникъ.

**П**роцвѣлъ еси яко кринъ, отче Іоакиме, благоуханьи твоихъ добродѣтель, наша благоухаеши души. Тѣмже совершающимъ память твою, моли избавитися злосмрадія согрѣшеній нашихъ и всякаго бѣсовскаго озлобленія.

**Богородичень:** Ты еси, Богородице, ору́жие наше и стѣна, Ты еси заступлѣніе къ Тебѣ прибѣгающихъ, Тя и нынѣ на молитву предлагаемъ, да избавимся отъ враговъ нашихъ.

**Свѣтиленъ преподобнаго. Подобенъ:** Со ученики.

Радуйся, горо́ пустынная, веселитесь вси роди земни, припадающе къ мощемъ пустыннаго отца Іоакима, глаголюще: умоли, преподобне, Владыку съ Богородицею, просвѣтити насъ, поющихъ тя.

**Слава, Образа.** [Подобенъ: Жены, услышите.]

Свѣтъ невечерній, Христѣ, просвѣти насъ лица Твоего зракомъ, и свѣтлости святыхъ сподоби, егда сядеши воздати кому́ждо по дѣломъ его, молитвами ро́ждшія Тя Богородицы.

**И нынѣ, праздника.** [Подобенъ тойже:]

О, колика величія Тебѣ Сильный сотвори! Отъ непло́дныя бо родилася еси, родила же еси Дѣва, и Дѣва паки пребывши, пребываеши же по смѣрти, смѣрти вы́шши, Чистая, и не оставляючи міра, о мірѣ молишися.

**На хвалитехъ стихиры преподобнаго отца,  
на 4, гласъ 3. Самогласны:**

Великихъ твоихъ подви́гъ и́стинное вѣщаніе, многострадальне́ отче Іоакиме, досто́йно насъ

созыва́етъ въ цѣрковь велегласно; свѣтло всѣмъ, вѣрніи, стецѣмся на торжество и преподобнаго отца пѣсньми воспоймъ, глаголюще: о́тче преблаженне, испроси́ намъ отъ Христа́ Бога велию милость.

**П**реподобне о́тче Іоакіме, дѣнь и но́щь поучаяся въ законѣ Господни, достоинъ былъ еси́ причащатися пи́щи дре́ва животно́го: отъ пло́да твои́хъ страда́ній вѣнцы́ цвѣту́тъ; дерзнове́ніе имѣя къ Подвигополо́жнику Христу́, проси́ очище́ніе душамъ нашимъ и велию милость.

**Б**олѣзньми по́стническими житіе́ равно а́нгеломъ на землі поживъ, о́тче Іоакіме, плоть покорилъ еси́ дѹху; совершитель бѣвъ заповѣдей Господнихъ, испѣрва о́бразъ добродѣтели сохранилъ еси́ подъ небесы, тѣмже воздая́ніе страда́льныхъ по́двигъ пріялъ еси́ отъ Христа́ Бога, подающаго намъ твоими моли́твами велию милость.

**С**ъ небесными ли́ки водворя́яся, о́тче Іоакіме, сподобился еси́ пресвѣтлою чистото́ю во плоти́ со земными́ пожити́ яко́ безплотенъ, нынѣ наслажда́еши́ся Божественны́я сла́вы. Тѣмже моли́ся отъ бѣдъ и тмы́ спасти́ ду́ши на́ша.

### **Сла́ва, гласъ 5:**

**Р**адуйся, пусты́нная крѣпосте, о́тче Іоакіме! Плотская́ угожде́нія отве́ргъ, былъ еси́ а́нгеломъ

сожитель; благоуханія всю гору, вертепы и пропасти исполнивъ, полки бѣсовскія и тмү еретическую попралъ еси, тѣмже въ вышнія вселился еси жити, преподобне отче Іоакиме, молися Христу Богу даровати душамъ нашимъ велию милость.

### **И нынѣ, праздника Богородицы, гласъ 1:**

Подобаше самовидцамъ Слова и слугамъ, и еже по плоти Матере Его успение видѣти, конечное елико на Ней таинство, яко да не токмо еже отъ земли Спасово восхождение узрятъ, но и Рождшія Его преставленію свидѣтельствууютъ. Тѣмже, отвсюду Божественною силою собравшеса, Сіона достигоша, и на небо идущую предсылаху, вышшую Херувимъ, Ейже и мы съ ними покланяемся, яко молящейся о душахъ нашихъ.

**Славословіе великое. По трисвятѣмъ:  
Тропарь преподобнаго отца. Слава, Образа. И  
нынѣ, праздника Богородицы.**

### **НА ЛИТУРГИИ,**

**Блаженна праздника, пѣснь 1-я, на 2, и  
Образа, пѣснь 4-я, на 2, и преподобнаго отца,  
пѣснь 6-я, на 4. Прокимень, гласъ 4:  
Воспойте Господеву пѣснь нову,\* яко дивна  
сотвори Господь. Стихъ: Видѣша вси концы**

земли́ спасе́ние Бо́га на́шего. **Апо́сто́ль къ Гала́томъ, зача́ло 213:** Бра́тие, пло́дъ духо́вный... **Аллилу́я, гласъ 6:** Блаже́нь му́жь, боя́йся Го́спода, въ за́повѣдехъ Его́ восхо́щеть зѣло́. [**Стихъ:** Си́льно на земли́ бу́детъ сѣмя его́.] **Ева́нгелие отъ Матѳея, зача́ло 43:** Вся́ Мнѣ́ предана́ су́ть... **Прича́стенъ:** Въ па́мять вѣ́чную бу́детъ пра́ведникъ, [отъ слуха́ зла́ не убой́тся].

**Источникъ:** Србляк. — Београд: Издаје Свети Архијерејски Синод Српске Православне Цркве, 1986. — С. 480-492.

